

दिनांक 07.09.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- प्रदेश रा घणकरा जिलां मांय लगातार मेह बरसबा सूं जनजीवन माथे असर-चार जिलां मांय बारिश रो रेड अलर्ट
- बत्ती बिरखा वाळा जिलां मांय प्रभारी मंत्री अर सचिव रो दौरा-उपमुख्यमंत्री डॉ. प्रेमचन्द बैरवा कइया-सरकार बत्तो मेह बरसबा सूं व्हीया नुकसान रो जायजो कर बेगी राहत देवेलां
- केन्द्रीय मंत्री डॉ. मनसुख मांडविया कइया-साइकिल माथे जीएसटी 18 फीसदी सूं 5 फीसदी करबा रा फैसला सूं फिट इण्डिया अभियान मांय तेजी आवेलां
- आज रात दशक रो सब उं लम्बो पूर्ण चंद्रग्रहण-दोपहर मांय सूतक लागबा रे सागे ही प्रदेश रा खास मिंदरा रा पट बंद-सुंवारे मंगला आरती रे सागे दर्शन व्हेलां

.....

प्रदेश रा घणकरा जिलां मांय लारला 2-3 दिन सूं लगातार व्हे री बारिश सूं लोगां ने परेशानी रो सामनो करणो पड़ रह्यो हैं राज्य रा केई जल स्त्रोत लबालब व्हे गया हैं वठीने हाल भी पाणी री आवक लगातार जारी हैं बीसलपुर बांध मांय पाणी री आवक लगातार बढ़ री हैं आज सुंवारे बांध रा आठ गेटां सूं पाणी री निकासी सरू करी गई राजधानी जयपुर मांय आज दोपहर पछे रुक-रुकर मेह बरस्यो सवाईमाधोपुर मांय आज दोपहर पाछे तेज बरसात रो दौर चाल्यो श्रीगंगानगर मांय घग्घर नदी रा बांध मांय कटाव होबा सूं केई खेतां मांय पाणी भर गयो वठीने डूंगरपुर मांय खड़गदा गांव मांय मोरेन नदी री रपट माथे पाणी रो बहाव घणो तेज व्हे गयो सलूम्बर रा डाया बांध मांय भी चादर चाल री हैं सिरौही जिला मांय सुंवारे सूं रुक-रुकर बारिश व्हे री हैं बत्ती जाणकारी म्हारां खबरनवीस सूं -

.....

मौसम महकमो आज जालौर, सिरौही, बाड़मेर, बालोतरा, उदयपुर अर आरे-सारे री ठोड़ा मांय तेज हवावां रे सागे भारी सूं बहुत भारी अर एक-दो ठोड़ा घणकरी भारी बिरखा रो अंदाजो हैं इण जिलां मांय काल भी इण भांत रा हालात बण्या रह सके हैं वठीने सवाईमाधोपुर मांय बत्ता पाणी सूं प्रभावित गांवां मांय मौसमी बीमारियां री रोकथाम खातर एन्टीलार्वा गतिविधियां अर फोगिंग करवाई जा री हैं

.....

राज्य मांय बत्ती बिरखा सूं प्रभावित हलका मांय जिला प्रभारी मंत्रियां अर प्रभारी सचिवां रा दौरा लगातार चाल रह्या हैं वे संबंधित अहलकारां सागे मेह बरसबा सूं बण्या हालात अर फसल खराबा बाबत समीक्षा कर रह्या हैं उपमुख्यमंत्री अर राजसमंद जिला प्रभारी मंत्री डॉ. प्रेमचंद बैरवा आज जिला कलेक्ट्रेट मांय जिला स्तरीय समीक्षा बैठक करीं वे अहलकारां ने निर्देश दिया के बत्ती बिरखा रे बीच किणी भी आपात स्थिति सूं निपटबा खातर प्रशासन पूरी भांत तैयार रेहवें डॉ. बैरवा कह्या के किणी भी टेम अनहोनी, जलभराव अर इण भांत री कोई खबर मिले तो तुरंत राहत अर बचाव री कार्यवाही सरू व्हेणी चाहिजें

.....

बारां जिला रा प्रभारी मंत्री ओटाराम देवासी भी जिला मुख्यालय माथे अहलकारां री बैठक ले र अतिवृष्टि रा हालात री समीक्षा करीं वणां कह्या के प्रशासन ने आपदा प्रभावित लोगां ताई तुरंत सहायता पुगाणी चाहिजें वे कह्या के इण मांय किणी भी भांत री कोताही बर्दाश्त नीं करी जावेलं श्री देवासी हाल ताई व्ही मानसूनी बरसात रा आंकड़ां अर अतिवृष्टि री वजह सूं व्हीया नुकसान अर आपदा मांय मरबा वाळा रा घराळा ने दी जाबा वाळी सहायता री भी विस्तार सूं सीमक्षा करीं कोटपूतली-बहरोड़ जिला रा दौरा माथे आया प्रभारी मंत्री विजय सिंह अहलकारां रे सागे हलका रो दौरा कर भारी बिरखा वाळा हलका रो जायजो कर्यो इण बीच आपदा प्रबंधन मंत्री किरोड़ी लाल मीणा कह्या के फसल खराबा रो सर्वे बेगी ही पूरो कर काश्तकारां ने उचित मुआवजो दियो जावेलं

.....

उत्तराखण्ड मांय भीषण बाढ़ रा हालात ने देखता थकां मुख्यमंत्री भजनलाल शर्मा पांच करोड़ रुपया री इमदाद राशि उत्तराखण्ड सरकार ने भेजी हैं श्री शर्मा उत्तराखण्ड रा मुख्यमंत्री पुष्कर सिंह धामी सूं फोन माथे बातचीत मांय कह्या के राजस्थान संकट री इण घड़ी मांय उत्तराखण्ड रे सागे कंधा सूं कंधा मिला र खड्डो हैं वे कह्या के उत्तराखण्ड मांय हाल ही मांय आई भीषण बाढ़ सूं उपज्या हालात अर उण सूं व्ही जनहानि रा समाचार घणा दुखद हां

.....

राज्य सरकार युवावां ने स्वावलंबी बणाबा अर वारां सुपना ने नई उड़ान देबा खातर कमर कस राखी हैं इण खातर विश्वकर्मा युवा उद्यमी प्रोत्साहन योजना ने मंजूरी दी गई हैं एक रपट —

.....

जीएसटी री दरां मांय हाल ही मांय कर्या गया सुधार इण महीना री 22 तारीख से लागू व्हेलां नई जीएसटी दरां रो चिकित्सा हलका माथे भी चौखो असर पड़ सके हैं शल्य, दंत अर पशु चिकित्सा समेत सगळा चिकित्सा उपकरण माथे जीएसटी री दरां घट र पांच फीसदी कर दी गई हैं पट्टियां, डायग्नॉस्टिक किट, ग्लूकोमीटर अर दूजा जरूरी चिकित्सा उपकरण माथे भी जीएसटी दर 12 फीसदी सूं घटा र 5 फीसदी कर दी गई हैं इण रे इतर, 33 जीवन रक्षक दवावां माथे कोई जीएसटी लागू नीं व्हेलां कैसर अर गंभीर बीमारियां सूं जुड़ी तीन जरूरी दवावां सूं भी जीएसटी हटा दी गई हैं एम्बुलेंस अर एम्बुलेंस री फिटिंग, फर्नीचर अर चिकित्सा सहायक उपकरण वाळी मोटर गाड़ियां माथे अबे 18 फीसदी जीएसटी लागेलां

.....

केन्द्रीय युवा कार्यक्रम अर खेल मंत्री मनसुख मांडविया कह्या के संडे ऑन साइकिल अबे एक आन्दोलन बण गयो हैं वे कह्या के स्वस्थ रहबा अर स्वदेशी ने बढ़ाबो देबा खातर 50 सूं बत्ता सांसद इण कार्यक्रम

मांय हिस्सा लियां श्री मांडविया आज नुवी दिल्ली मांय राख्या एक कार्यक्रम मांय बोल रह्या हां वे बताया के साइकिल माथे जीएसटी 18 फीसदी सूं घटा र 5 फीसदी कर दी गई हैं

.....

सवाईमाधोपुर मांय भी फिट इंडिया अभियान रे तेत संडे ऑन साइकिल रैली राखी गई जिला प्रशासन अर प्रदूषण नियंत्रण मंडल री कानी सूं राखी इण रैली रे जरिए लोगों ने स्वस्थ रहबा रो संदेश दियो गयो

.....

आज पूर्ण चंद्र ग्रहण हैं ओ ग्रहण पूरा भारत मांय साफ दिखाई देवेलां चंद्रग्रहण रात आठ बज र 58 मिनट सूं सरू व्हेर देर रात दो बज र 25 मिनट माथे पूरो व्हेलां आ दुर्लभ खगोलीय घटना एक दशक मांय सब उं लम्बा ग्रहण मांय सूं एक व्हेलां भारतीय पंचाग रे मुजब आज भाद्रपद पूर्णिमा सूं श्राद्ध पक्ष री सरूआत व्हे री हैं या 15 दिन तांई रेवेलां इण रे पाछे 22 सितम्बर सूं नवरात्र सरू व्हे जावेलां चन्द्र ग्रहण रे चालता सूतक लागाब सूं राज्य रा मिंदरां रा पट दोपहर पछे सूं काल सुंवारे तांई बंद कर दिया गया हैं सवाईमाधोपुर रा प्रसिद्ध रणथम्भौर त्रिनेत्र गणेश मन्दिर अर चौथ माता मिंदर समेत खास मिंदरां रा पट बंद कर दिया गया हैं

चूरू जिला मांय भी सालासर बालाजी मिंदर रा कपाट दोपहर पछे बंद कर दिया गयां सुंवारे मंगला आरती रे सागे ही भक्तां खातर मिंदरा रा कपाट खोल्या जावेलां

.....

पुरुष एशिया कप हॉकी चैम्पियनशिप रो फाइनल मुकाबलो आज सिंज्या भारत अर कोरिया रे बीच खेल्यो जावेलां ओ मैच बिहार रा राजगीर मांय सिंज्या साढ़े सात बज्यां सरू व्हेलां भारतीय टीम एशिया कप तीन बगत जीत चुकी हैं कोरिया लारली बगत ओ खिताब जीत्यो हों मौजूदा चैम्पियनशिप मांय भारतीय टीम हाल तांई अजेय री हैं भारतीय टीम मलेशिया अर चीन री मजबूत टीमां ने हरा र फाइनल मांय पूगी हैं

.....

प्रधानमंत्री नरेन्द्र मोदी रो आकाशवाणी सूं प्रसारित होबा वाळो मासिक कार्यक्रम मन की बात 28 सितम्बर ने व्हेलां आ इण कार्यक्रम री 126वीं कड़ी व्हेलां इण खातर 26 सितम्बर तांई टोल-फ्री नंबर 1800-11-7800 माथे सुझाव भेज्या जा सके हैं नरेन्द्र मोदी एप अर माय जीओवी ओपन फोरम रे जरिए सूं भी विचार भेज्या जा सके हैं

.....